

## **Naqqiut**

Siunnersuut 13. august 2021-meersoq taarserpaa

(Kisitsisit naqinneri iluarsineqarput siunnersuummi immikkoortut pingaarnerni qupp. 2-mi aamma siunnersuummi aalajangersakkanut ataasiakkaanut nassuiaatini § 2 imm. 3-mi)

Siunnersuummut nassuiaatit

## **Nassuiaatit nalinginnaasut**

### **1. Aallaqqaasiut**

Kommunit aggornerisa avataanni sumiiffinni innuttaasunut siulersuisut pillugit Inatsisartut inatsisissaannut siunnersuummik matuminnga saqqummiussinissaq, inatsisip atuuttup ullutsinnut naleqqutinnginnerata aammalu immikkoortuni qitiusuni allanngorarsinnaannginnerata malitsigaa. Assersuutigalugu inatsimmi atuuttumi suliassat Namminersornerullutik Oqartussat (maannakkut Namminersorlutik Oqartussat) sularisagaat kisimik ilaatinneqarput. Taamaalilluni suliassat ullumikkut suliassanngortartut imaluunniit kommuninut imaluunniit oqartussanut allanut taarsiullugu sularineqartartut inatsimmi atuuttumi ilaatinneqanngillat. Tamatuma saniatigut aamma suliassat arlallit taamaallaat sumiiffimmi atuuttut inatsimmi atuuttumi ilaatinneqanngillat.

Taaguut nunaqqatigiit siunnersuisoqatigiivi, innuttaasut siulersuisuinit allanngortinneqarpoq. Inatsisissatut siunnersuummi matumani innuttaasut siulersuisuisa suliassai ataatsimut isiginerullugit oqaasertalerneqarput. Tamatumani suliassat suut innuttaasut siulersuisuisa isumagisinnaaneraat pillugu inatsisissatut siunnersuummi pisariaqartumik eqaatsuutitsisoqarpoq. Matuma siuliani allassimasut naapertorlugit inatsisissatut siunnersuummi oqaasertaliinermi aamma suliassat kommuninut imaluunniit oqartussanut allanut suliakkiutigineqarsimasut, imaluunniit najukkami inissisimatinneqartut innuttaasut siulersuisuinit isumagineqarsinnaanerinut, periarfissamik ammaasoqarpoq.

Suliassat suut innuttaasut siulersuisuisa isumagisinnaasussaasariaqarneraat takussutissinniarlugu, suliassat pingaarnersaat Pituffimmi nunaqqatigiit siunnersuisoqatigiivisa maannakkorpiaq tamakkiisumik ilaannaasumilluunniit akisussaaffigisaannut takussutissiarineqarput:

A: Allaffissornikkut suliassani ilitersuineq, innersuussineq aamma suliassamik sularinnineq, soorlu:

- taasivissamik pilersitsinikkut qinersititsineq aamma qinersinerup ingerlanneqarnera,
- akileraarutit pillugit apeqqutinut akissuteqarneq, ilanngullugit akileraartarnikkut uppersaatit,
- CITES-imi uppersaatiniq immersuineq,
- najugaqarnermut uppersaatiniq pissarsiniarneq,

- suliffeerunnermi ikiorsiissutinik tunniussinissamik qinnuteqaatinik suliarinninneq,
- umimmanniarnissamut tuttunniarnissamullu akuersissutinik aqutsineq,
- unnukkut atuartitsinermik ingerlatsineq, ilanngullugit init atuartitsiviusussat, atuartitsisussat aammalu atorussat.

B: Sinniisuunnermi suliassani ataqatigiissaarineq, paasissutissiisarneq aammalu qaaqquisuunnermut isumaginninneq, soorlu:

- Kunngikkormiut, Inatsisartut, Naalakkersuisut, atorfillit, palasit, suliffeqarfiit, pisortani sullissiviit il.il. tikeraarneri
- inunnut Qaanaameersunut, Qeqertaneersunut, Siorapalummeersunut aamma Savissivimmeersunut, Pituffimmiittunut ikiuunneq,
- nunatta inuiattut ullorsiornerata nalliussinera,
- politiinik, danskit sakkutuunut attaveqaataannik aamma Air Greenland-imik ataqatigiissaaraluni ataatsimeeqateqarnerni peqataaneq,
- US Air Force aamma suliffeqarfiit kiffartuussinissamut isumaqatigiissuteqartut paasissutissiilluni ataatsimeeqatigineqarneranni peqataaneq,
- Armed Forces Day upernaat tamaasa ingerlanneqarneranni peqataaneq:
- najukkami paasissutissiivinnik nutarterinermermi peqataaneq.

Innuttaasut siulersuisuisa Namminersorlutik Oqartussanit aamma oqartussanit attuumassuteqartunit allanit suliarinninnissamut pisariaqartunik piginnaatitsissuteqarfigineqarnissartik ingerlaavartumik isumaginissaa, innuttaasut siulersuisuisa akisussaaffigaa.

## **2. Siunnersuummi immikkoortut pingaarnertit**

Kommunit aggorneqarnerisa avataanniittut nunaqqatigiit siunnersuisoqatigiivi pillugit Inatsisartut inatsisaanni atuuttumi § 1-imi aalajangersarneqarpoq:

”Naalakkersuisut danskit amerikamiullu illersornissamut sakkutooqarfiini allaniluunniit sumiiffinni kommunit aggorneqarnerisa avataaniittuni nunaqqatigiit siunnersuisoqatigiivinut suliassat taakkualuunniit ilaat Naalakkersuisut sinnerlugit ingerlateqqullugit tunniussinnaavaat. Suliassat makkuusinnaapput, isumaginninneq, kultureqarneq, atuartitaaneq allatigullu pissutsit pillugit suliassat sumiiffinni nunaqqatigiinnut tunngassutillit Namminersornerullutik Oqartussat isumagisartagaat.”

Inatsimmut atuuttumut sanilliullugu taaguutaa nunaqqatigiit siunnersuisoqatigiivi, innuttaasut siulersuisuinut allanngortinneqassasoq siunnersuutigineqarpoq. Allanguut taanna oqaatsitigut taamaallaat allanguutaavoq innuttaasut siulersuisuisa suliassaqarfii maleruagassiivigineqaratik. Oqaatsitigut allannguutaa taanna siunnersuutigineqarpoq, siulersuinut taaguut nunaqarfinni aqutsisuni aammalu kommunalbestyrelsimi atorneqartoq atorniarlugu.

Inatsisissatut siunnersuummi § 1-imi innuttaasut siulersuisuisa suliassai ataatsimut isigalugit nassuiarneqarput. Inatsisinut atuuttunut tunngatillugu nunaqqatigiit siunnersuisoqatigiivisa suliassaasa nassuiaataannut immikkuullarinnerujussuusunut, taamaalillunilu allanngorarsinnaanngitsunut, saniliullugu taanna allannguutaavoq.

Allanngorarsinnaannginnera sumiiffiit suliassallu ineriartorneranni naapertuutinngitsoq paasinarsisimavoq. Assersuutigalugu suliassanik kommunit imaluunniit oqartussat allat sularisartagaannik isumaginninneq, kiisalu suliassanik ataqatigiissaariviusussanik najukkami inissisimatinnegartunik isumaginninnissaq, inatsimmi atuuttumi pineqartunut ilaatinneqanngillat.

Taamaattumik nassuiaataa allanngortinneqassasoq siunnersuutigineqarpoq, tassalu innuttaasut siulersuisui Namminersorlutik Oqartussat sinnerlugit sumiiffinni kommunit aggornerisa avataanni inoqarfinni suliassanik imaluunniit taakkua ilaannik isumaginnissinnaasut. Taamaaliormi tunngaviatigut aamma suliassat kommuninut imaluunniit oqartussanut allanut isumagineqartussanngorlugit suliakkiutigineqartussaagaluartut, pineqartunut ilaatinneqarput.

Innuttaasut siulersuisuisa suliassaanni taamaalilluni suliassat Namminersorlutik Oqartussanit, kommunimit imaluunniit oqartussamit allamit isumagineqartussaagaluartut akuleriissillugit sularineqartussaassapput. Pinngortitaleriffiup Pituffimmi eqqaanilu sumiiffimmi annertunerusumi umimmannik alapernaarsuinnermut nunaqqatigiit siunnersuisoqatigiivinit ikiorneqartarsimanera, oqartussami allami suliassanut assersuutitut taaneqarsinnaavoq.

Maannakkorpiaq nunaqqatigiit siunnersuisoqatigiivi ataasiinnaat ingerlapput. Taakkua tassaapput Pituffimmi nunaqqatigiit siunnersuisoqatigiivi. Pituffimmi nunaqqatigiit siunnersuisoqatigiivi pisortat avammut kiinnertartoraat. Nunaqqatigiit siunnersuisoqatigiivi Pituffimmut tikeraartunut pisortat sullissinerannik suliqartarput.

Kommunet aggorneqarnerisa avataanniittut nunaqqatigiit siunnersuisoqatigiivi pillugit Inatsisartut inatsisaanni maannakkut atuuttumi § 2-imi aalajangersarneqarpoq:  
 ”Nunaqqatigiit siunnersuisoqatigiivi qinerneqassapput sumiiffinni aalajangersimasumik nunaqartunit, qaammatini ikinnerpaamik 6-imi tamaaniittunit, qallunaatut avannaamioqatigiinnilu innuttaassuseqartunit Kalaallit Nunaannilu Namminersornerullutik Oqartussanut akileraartartunit. Imm. 2. Naalackersuisut siunnersuisoqatigiinnik qinersineq pillugu inatsisit aalajangersassavaat taakkunungalugu ilanngullugit ilaasortat ataqqinassuseqarnerannut piumasaqaatit.”

Aalajangersakkami siunnersuutigineqartumi § 2 pisariinnerulersinneqarpoq aammalu annertusitinneqarluni aamma siunnersuummi § 2 aamma § 3 pineqartunut ilaatinneqarlutik. Assersuutigalugu akileraartussaataaneq piumasaqaatigineqanngilaq. Tamatuma saniatigut ilaasortat amerlassusaat aamma piffissaq qinigaaffiusoq kiisalu qinersisinnaatitaaneq aamma

qinigaasinnaatitaaneq pillugit aalajangersakkat inatsisissatut missingiummiit nalunaarummut nuutinneqarput. Peqatigisaanik suliassaqarfinnut taakkununga naleqqussaasoqarpoq, taamaalilluni aalajangersakkanut kommunalbestyrelsinut aamma nunaqarfimmi aqutsisunut qinersinermut atuuttunut naapertuunnerulersitsisoqarluni.

Tamatuma saniatigut inatsisissatut siunnersuut kommunit aggorneqarnerisa avataanniittut nunaqqatigiit siunnersuisoqatigiivi pillugit Inatsisartut inatsisaat nr. 13, 20. oktober 1988-imeersumut atuuttumut sanilliullugu oqaatsitigut nutarterneqarpoq.

### **3. Pisortanut aningaasaqarnikkut allaffissornikkullu sunniutaasussat**

Nunaqqatigiit siunnersuisoqatigiivinut (siunissami innuttaasut siulersuisuisut taagorneqartussatut siunnersuutigineqartut) aningaasartuutit aningaasanut inatsimmi maleruagassiivigineqassaaq. Maannakkorpiaq nunaqqatigiit siunnersuisoqatigiivi ataasiinnaapput. Tassalu Pituffimmi nunaqqatigiit siunnersuisoqatigiivi. 2021-mut aningaasanut inatsimmi Pituffimmi nunaqqatigiit siunnersuisoqatigiivinut aningaasartuutissat kontumi 10.03.04 Nunaqqatigiit siunnersuisoqatigiivi (Tapiissutitut aningaasaliissutit) 403.000 koruuninik aningaasaliissutitaqartillugit maleruagassiivigineqarput. Innuttaasut siulersuisuinik allanik pilersitsisoqassasoq aalajangiisoqassagaluarpat, innuttaasut siulersuisuinut tamaginnut immikkut aningaasartuutit, minnerpaamik Pituffimmi innuttaasut siulersuisuinut immikkoortinneqartut aningaasartaattut annertussuseqassapput.

### **4. Inuussutissarsiortunut aningaasaqarnikkut allaffissornikkullu sunniutaasussat**

Siunnersuut inuussutissarsiortunut aningaasaqarnikkut imaluunniit allaffissornikkut sunniuteqassanngilaq.

### **5. Avatangiisinut, pinngortitamut aamma inuit peqqissusaannut sunniutaasussat**

Siunnersuut avatangiisinut, pinngortitamut imaluunniit inuit peqqissusaannut sunniuteqassanngilaq.

### **6. Innuttaasunut sunniutaasussat**

Inatsisip oqaasertai siunnersuutigineqartut atuunneranni, pisortat ingerlatsineranni suliassaqarfii nutaat inatsisip oqaasertaanni ilaatinneqarsinnaassapput, inatsisip allanngortinneqarnissaa pisariaqassanani. Tamanna innuttaasut oqartussallu akornanni sulianik ingerlatitsisarnernik eqaannerulersitsissaaq.

### **7. Sunniutaasussat allat annertuut**

Maannakkut nunaqqatigiit siunnersuisoqatigiivi atuutilersitsinermi allanngortinneqarpoq, taakkua nunaqqatigiit siulersuisuinut taaguutaat allanngorluni. Tamatuma saniatigut inatsit manna naapertorlugu atuunnerat ingerlaannarpoq.

### **8. Oqartussanut kattuffinnullu i.il. tusarniaaneq**

Piffissami 2019-imi decembarip 16-aniit 2020-imi januaarip 16-anut tusarniaaneq ingerlanneqarpoq. Makkua tusarniaaffigineqarput: Pinngortitamut Avatangiisinullu Naalakkersuisoqarfik, Aningaasaqarnermut Naalakkersuisoqarfik, Ilinniartitaanermut, Kultureqarnermut Ilageeqarnermullu Naalakkersuisoqarfik, Nunanut Allanut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Isumaginninnermut Inatsisinillu Atuutsitsinnermut Naalakkersuisoqarfik, Inuussutissarsiornermut, Nukissiuuteqarnermut, Ilisimatusarnermut Suliffeqarnermullu Naalakkersuisoqarfik, Ineqarnermut Attaveqaqatigiinnermullu Naalakkersuisoqarfik, Aatsitassanut Naalakkersuisoqarfik, Peqqissutsimut Naalakkersuisoqarfik, Arktisk Kommando, Pituffimmi nunaqqatigiit siunnersuisoqatigiivi, Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq, Kalaallit Nunaanni Politiit

Tusarniaanermut akissuteqaatit 8-it tiguneqarput, takuuk allattuiffik matuma kingulianiittoq.

<b>Tiguneqarpoq ulloq</b>	<b>Oqartussaq</b>	<b>Tusarniaanermut akissuteqaatip imarisai</b>	<b>Tusarniaanermut akissuteqaat makkuninnga pissutissaqalersitsivoq</b>
16/12 2019	Isumaginninnermut Inatsisinillu Atuutsitsinnermut Naalakkersuisoqarfik	Oqaaseqaateqanngilaq	
17/12 2019	Inuussutissarsiornermut, Nukissiuuteqarnermut, Ilisimatusarnermut Suliffeqarnermullu Naalakkersuisoqarfik	Oqaaseqaateqanngilaq	
19/12 2019	Arktisk Kommando	Oqaaseqaateqanngilaq	
6/1 2020	Sulisitsisut – Grønlands Erhverv	Oqaaseqaateqanngilaq	
13/1 2020	Peqqissutsimut Naalakkersuisoqarfik	Oqaaseqaateqanngilaq	
14/1 2020	Kommuneqarfik Sermersooq	Oqaaseqaateqanngilaq	
29/1 2020	Kommune Qeqertalik	Oqaaseqaateqanngilaq	
15/1-20	Kommune Kujalleq	Kommuni allappoq, nassuiaatini allassimasoq ”Innuttaasut siulersuisuisa Namminersorlutik Oqartussanit imaluunniit kommuninit suliassaqarfinnik suliarrinnissamut	Kommunit oqaaseqatigiinnit peerlugu, ilanngunneqarpoq.

		<p>pisariaqartunik pisinnaatitsis-suteqarfigineqarnissartik ingerlaavartumik isumagissavaat” aammalu kommunimit pisinnaatitsissuteqarnissaq attuumassuteqartoq, kommunip takujuminaatsippaa.</p> <p>Tamatuma saniatigut innuttaasut siulersuisuinut qaqugukkut qinersisoqartassanersoq, inatsisissatut siunnersuummi imaluunniit nassuiaatini itisiliisoqassasoq kommunip inassutigaa, tassami inatsisissatut siunnersuummi 1. august 2020 ulloq atuutilerfissaatut allassimammat, piffissaq qinersiviusoq 1. junimiit aallartittartoq, nunaqqatigiit siunnersuisoqatigiivinut qinersineq pillugu nalunaarummi allassimalluni.</p> <p>Tamatuma saniatigut inatsisissatut siunnersuutip aammalu nalunaarutip atuutsinneqartup akornanni qinersinermut aalajangersakkanik naapertuuttuutitsinissaq qulakkeerseqassasoq, kommunip inassutigaa.</p>	<p>Nalunaarutip nutarterneqarnerani ilanngunneqassaaq.</p> <p>Nalunaarut nutarterlugu ilaatigut ilanngunneqassaaq.</p>
--	--	---	--

Tusarniaaareernermi oqaasertaannik inatsisilerinikkut allanngortitsisoqarpoq. Imarisaannut tunngasuni annertuunik allanngortitsisoqanngilaq. Taamaattumik tamanut ammasumik nutaamik tusarniaasoqanngilaq.

**Siunnersuummi aalajangersakkanut ataasiakkaanut nassuiaatit***§ 1-imut*

## Imm. 1-imut

Aalajangersagaq inatsimmut atuuttumut sanilliullugu oqaatsitigut allanngortinneqarpoq, taamaalilluni suliassanut nunaqqatigiit siunnersuisoqatigiivisa akisussaaffigisinnaasaannut nassuiaatit, ataatsimut isigalugit oqaasertalerneqarlutik. Tamatuma saniatigut aalajangersakkap allanngortinneqarnissaa siunertarineqanngilaq.

Aalajangersakkami innuttaasut siulersuisuisa sumiiffinni inoqartuni kommunit aggornerisa avataanniittuni Namminersorlutik Oqartussat sinnerlugit suliassanik taakkualuunniit ilaannik isumaginninnissaannut killissaliussat aalajangersarneqarput.

Aammattaaq nassuiaatit nalinginnaasut innersuussutigineqarput.

## Imm. 2-imut

Aalajangersagaq nutaajuvoq aammalu suliassat innuttaasut siulersuisuinit sularineqartarnissaat Naalakkersuisut pisariaqartikkunnaarpasuk, Naalakkersuisut innuttaasut siulersuisuisa atorunnaarsinneqassasut aalajangernissamut periarfissaqarlutik.

## Imm. 3-mut

Aalajangersagaq nutaajuvoq. Innuttaasut siulersuisuisa atorunnaarsinnissaannut tunngavilersuutaasinnaasunut allattukkat allassimasut tamakkiisutut isigineqarput.

*§ 2-mut*

Aalajangersagaq nutaajuvoq. Aalajangersagaq nalunaarummiittoq inatsisissatut siunnersuummi ilanngunneqarpoq.

## Imm. 1-imut

Sumiiffik paasineqassaaq killissalernerqarsinnaasoq kiisalu sumiiffik sumiiffimmi imaluunniit allaffissornikkut ataqatigiisooq. Qinersivinnut tamanut innuttaasunut siulersuisut ataatsit qinerneqarsinnaapput.

## Imm. 2-mut

Innuttaasut siulersuisui 3-nik imaluunniit 5-inik ilaasortaqaarsinnaapput. Ilaasortat amerlassusaat pillugu aalajangiisoqarsimangippat, ilaasortanik 3-nik qinersisoqassaaq. Innuttaasut siulersuisui nutaat pilersinneqarlutik pisoqartillugu tamanna assersuutigalugu pisinnaavoq.

## Imm. 3-mut

Innuttaasut siulersuisuisa piffissami aggersumi qinigaaffissaanni ilaasortat amerlassusissaat innuttaasut siulersuisuisa aalajangersassavaat. Ilaasortat amerlassusissaat pillugu

aalajangiineq ulloq qinersivissaq kingusinnerpaamik qaammatinik pingasunik sioqqullugu pissaaq. Tassa imaappoq ukiumi qinersiviusussami kingusinnerpaamik ulloq 1. marts.

### § 3-imut

Innuttaasut siulersuisuinit inuit qinersisinnaatitaanersut aalajangersakkami maleruagassiivigineqarpoq.

Qinersisinnaatitaaneq pillugu aalajangersagaq annertusitinneqarpoq, ilaatigut nalunaarummiittut ilai inatsisissatut siunnersuummi ilanngunneqarlutik.

#### Imm. 1-imut

Aalajangersagaq allanngortinneqarpoq, taamaalilluni taasisinnaatitaanissamut Kalaallit Nunaanni akileraartussaataaanaissaq piunasaqaataajunnaarluni.

Peqatigisaanik aalajangersakkami naleqqussaasoqarpoq, taamaalilluni aalajangersakkanut kommunalbestyrelsimut aamma nunaqarfimmi aqutsisunut qinersinermut atuuttunut naapertuunnerulersitsisoqarluni.

Aalajangersakkami immikkoortoq 1-imi aalajangersarneqarpoq danskisut innuttaassuseqartut, 18-inik ukioqalereersimasut, qinersinissaq sioqqullugu minnerpaamik qaammatini 6-ini Kalaallit Nunaanni aalajangersimasumik najugaqarsimasut, aammalu kommunit aggornerisa avataanni sumiiffimmi pineqartumi qinersinissaq sioqqullugu kingusinnerpaamik sapaatit akunnerini 6-ini aalajangersimasumik najugaqarsimasut, qinersisinnaatitaasut. Qinersisinnaatitaasuni ilaatinneqanngillat inuit Kalaallit Nunaanni inatsisitigut atuuttumik nammineertussaajunnaarsinneqarsimasut.

Aalajangersakkami immikkoortoq 2-mi aalajangersarneqarpoq, nunani avannarlerni nunami allami naalagaaffimmi innuttaassuseqartut, 18-inik ukioqalereersimasut, naalagaaffimmi minnerpaamik ukiuni 3-ni aalajangersimasumik najugaqarsimasut, qinersinissaq sioqqullugu minnerpaamik qaammatini 6-ini Kalaallit Nunaanni aalajangersimasumik najugaqarsimasut, aammalu kommunit aggornerisa avataanni sumiiffimmi qinersinissaq sioqqullugu kingusinnerpaamik sapaatit akunnerini 6-ini aalajangersimasumik najugaqarsimasut, qinersisinnaatitaasut. Qinersisinnaatitaasuni ilaatinneqanngillat inuit Kalaallit Nunaanni inatsisitigut atuuttumik nammineertussaajunnaarsinneqarsimasut.

Immikkoortoq 2-mi inuiaassutsimut tunngatillugu kommunimut qinersinermi atuuttoq aalajangersagaq malinneqanngilaq. Tamatumunnga pissutaavoq kommunit aggornerisa avataanni sumiiffinni inuit nunani avannarlerni nunami naalagaaffimmi innuttaassuseqartuunngitsut amerlasoorpassuit najugaqarsinnaanerat, taamaattoqarpallu inunnit qinersisinnaatitaasunit amerlanerujussuusinnaallutik.



Allatigut aamma nassuiaatit nalinginnaasut innersuussutigineqarput.

Imm. 2-imut

Aalajangersakkami qinersinernut allanut aalajangersakkat assigalugit aalajangersarneqarpoq, qinersisartut allassimaffianniigani qinersisinnaatitaanermik atuisoqarsinnaanngitsaq.

Takuuk § 3, imm. 4, qinersisartut allassimaffiat pillugu aalajangersakkat Naalackersuisunit nalunaarummi aalajangersarneqarsinnaapput.

#### *§ 4-mut*

Inuit kikkut innuttaasut siulersuisuinut qinigaasinnaatitaanersut aalajangersakkami maleruagassiivigineqarpoq.

Qinigaasinnaatitaaneq pillugu aalajangersagaq annertusitinneqarpoq, ilaatigut nalunaarummiittut ilai inatsisissatut siunnersuummi ilanngunneqarlutik.

Imm. 1-imut

Innuttaasut siulersuisuinut qinigaasinnaasunut tunngavissarititaasut, qinersisinnaatitaasunut atuuttut assigigaat, aalajangersakkami aalajangersarneqarpoq.

Peqatigisaanik aalajangersakkami naleqqussaasoqarpoq, taamaalilluni aalajangersakkanut kommunalbestyrelsimut aamma nunaqarfimmi aqutsisunut qinersinernut atuuttunut naapertuunnerulersitsisoqarluni.

Qinigaasinnaatitaanissamut qinigassanngortittoq ukiut 5-it kingulliit iluanni inaarutaasumik eqqartuussinermi imaluunniit akiliisitsissummik akuersinermi pinerluttulerinermi inatsisitigut pineqaatissinneqarsimassanngilaq imaluunniit nalinginnaasumik tusaamaneqarnermi innuttaasut siulersuisuini ilaasortaanissamut pineqartumut naleqqukkunnaarsitsisumik ukiut 3-it iluanni pinerluttulerinikkut pineqaatissinneqarsimassanani. Piffissamut killiliussat ulloq qinersiviusoq aallarnerfigalugu naatsorsorneqassapput.

Imm. 2-mut

Aalajangersagaq nutaajuvoq. Qinersinernut allanut aalajangersakkat assigalugit aalajangersakkami aalajangersarneqarpoq, pinerluttulerinermi inatsisitigut pineqaatissinneqarsimaneq pissutigalugu qinigaasinnaatitaannginneq pillugu akerlilisoqarnera apeqquataatinnagu, inuk tamatigut qinersinissamut qinigassanngortissinnaasoq.

Imm. 3-mut

Aalajangersagaq nutaajuvoq. Nalunaarutiginninneq allaganngorlugu pissaaq atsiorneqarsimassallunilu. Aalajangersagaq Inatsisartunut qinersineq pillugu Inatsisartut inatsisaannut aamma kommunalbestyrelsimut qinersineq pillugu Inatsisartut inatsisaannut sanilliunneqarsinnaavoq.

Takuuk § 3, stk. 4, qinigassanngortittunik nalunaarutiginninneq pillugu aalajangersakkat Naalackersuisunit erseqqinnerusumik aalajangersarneqarsinnaapput.

#### Imm. 4-imut

Aalajangersakkami Naalackersuisut innuttaasut siulersuisuinut ilaasortassanik qinersisarneq pillugu maleruagassanik erseqqinnerusunik aalajangersaanissamut piginnaatinneqarput, ilanngullugu ilaatigut qinersinermut siulersuisunik pilersitsineq, qinersisartut allasimaffiannik suliaqarneq, qinigassanngortittunik nalunaarutiginninneq, taasinernut maleruagassiineq, qinersinerup ingerlanneqarnera kiisalu qinersinerup inerneru pillugu naatsorsuineq nalunaarutiginninnerlu.

Pissutsit taakkua Naalackersuisunit maleruagassiivigineqarsinnaanerannut tunngavilersuutaavoq, aalajangersakkanik kommunit aggornerisa avataanni sumiiffinni ataasiakkaani naleqqussarneqartunik aalajangersaasoqarsinnaanissaa.

#### § 5-imut

Aalajangersagaq nutaajuvoq.

Aalajangersakkami aalajangersarneqarpoq, innuttaasut siulersuisui inissitsiterluni ataatsimiinnermi innuttaasut siulersuisuinut siulittaasumik qinersissasut. Siulittaasoq piffissaq qinigaaffik tamaat qinigaavoq.

#### Imm. 2-imut

Aalajangersakkami aalajangersarneqarpoq innuttaasut siulersuisuisa nammineq suleriaasissartik akuerissagaat.

#### Imm. 3-imut

Aalajangersakkami aalajangersarneqarpoq, innuttaasut siulersuisui suleriaasissami akuerineqartup assilineranik nassiussissasut. Tamanna mail-ikkut pisinnaavoq uunga tilsyn@nanoq.gl.

#### Imm. 4-imut

Aalajangersakkami aalajangersarneqarpoq, Naalackersuisut innuttaasut siulersuisuisa atuunnerat pillugu aalajangersakkanik erseqqinnerusunik nalunaarummi aalajangersaasinnaasut. Taanna assersuutigalugu suleriaasissatut nalinginnaasutut, innuttaasut siulersuisuisa najoqqutassatut atorsinnaasaattut iluseqarsinnaavoq.

*§ 6-imut*

Aalajangersagaq aaqqissuussinikkut allannguuteqartillugu annertunerpaatigut § 3-mi aalajangersakkamik atuutereersumik ingerlatitseqqiineruvoq, aammalu allanngortitsinissaq eqqarsaatigineqanngilaq.

Aalajangersakkami aalajangersarneqarpoq, Naalackersuisut innuttaasut siulersuisuisa naatsorsuutiniq saqqummiussisarnissaat, taakkunannga kukkuneruisarnissaq, missingersuutiniq siunnersuummik saqqummiussisarnissaq aammalu allatigut aningaasaqarnikkut susassaqarfinnik ingerlatsinissaq pillugu nalunaarummi maleruagassanik aalajangersaassasut.

*§ 7-imut*

Aalajangersagaq aaqqissuussinikkut allannguuteqarluni § 4-mi aalajangersakkamik atuutereersumik ingerlatitseqqiineruvoq, aammalu allanngortitsinissaq siunertarineqarani.

Aalajangersakkami aalajangersarneqarpoq, innuttaasut siulersuisuiniq suliassat Inatsisartut inatsisaanni matumani aalajangersarneqartut innuttaasut siulersuisuiniq isumagineqarnissaannik periarfissaqarnissamut kiisalu innuttaasut siulersuisuiniq allaffissornermut aningaasassat ukiumoortumik aningaasanut inatsimmi aalajangersarneqartassasut.

*§ 8-imut*

Imm. 1-imut

Aalajangersakkami allassimavoq Inatsisartut inatsisaat ulloq 1. januar 2022 atuutilissasoq.

Imm. 2-imut

Maleruagassat maannamut Inatsisartut inatsisaanni atuuttumi tunngaveqartut, taakkua nalunaarummit nutaamit atorunnaarsinneqarnissamik tungaanut atuutiinnarnissaat, aalajangersakkami qulakkeerneqarpoq. Nalunaarut atuuttoq tassaavoq Nunaqqatigiit Siunnersuisoqatigiiviniq ilaasortassanik qinersisarneq pillugu Namminersornerullutik Oqartussat nalunaarutaat nr. 8, 21. marts 2005-imeersoq.